



Broj: 0111-02-1-2278(21)
Sarajevo, 13.12.2021. g.

Na temelju člana 61. stav (2) Zakona o upravi („Službeni glasnik BiH”, br. 32/02, 102/09 i 72/17), člana 13. stav (2) Zakona o ravnopravnosti spolova u Bosni i Hercegovini (Službeni glasnik BiH”, broj 32/10), člana 86a. Zakona o radu institucijama Bosne i Hercegovine („Službeni glasnik BiH”, br. 26/04, 7/05, 48/05, 60/10, 32/13 i 93/17) i člana 22. Statuta Instituta za nestale osobe Bosne i Hercegovine, a u skladu sa Zaključcima VM BiH sa sjednice održane 15.10.2019. godine Kolegij direktora na svojoj 12. sjednici održanoj dana 01.12.2021. godine d o n o s i:

**ODLUKU
O POLITICI NULTE TOLERANCIJE PREMA DJELIMA
SEKSUALNOG UZNEMIRAVANJA I UZNEMIRAVANJA NA TEMELJU SPOLA
U INSTITUTU ZA NESTALE OSOBE BOSNE I HERCEGOVINE**

Član 1.

Institut za nestale osobe Bosne i Hercegovine (u daljem tekstu: Institut) je opredjeljen da osigura radnu sredinu bez seksualnog uznemiravanj i uznemiravanja na osnovu spola za sve osobe.

Član 2.

(1) Niko nema pravo da seksualno uznemirava ili uznemirava na osnovu spola bilo koju osobu na radnom mjestu i u vezi sa radom.

(2) Navedeno se posebno odnosi na:

- a) Pravo na radnu sredinu bez seksualnog uznemiravanja i uznemiravanja na osnovu spola;
- b) Obavezu reagovanja kada su druge osobe žrtve seksualnog uznemiravanja i uznemiravanja na osnovu spola;
- c) Obvezu prijavljivanja seksualnog uznemiravanja i uznemiravanja na osnovu spola;
- d) Pravo na povjerljivost podataka disciplinskog postupka.

Član 3.

(1) Seksualno uznemiravanje ili uznemiravanje na osnovu spola su zabranjeni zakonima Bosne i Hercegovine.

(2) Ovim propisima je utvrđeno da seksualno uznemiravanje i uznemiravanje na osnovu spola postoji kada se radi o ponašanju koje je:

- neželjeno;
- verbalno, neverbalno ili neprimjereno fizičko ponašanje;
- seksualne prirode ili na osnovu spola;
- zastrašujuće, neprijateljsko, degradirajuće, ponižavajuće ili uvredljivo ili kojim se postiže takav učinak.

Član 4.

Institut za nestale osobe Bosne i Hercegovine će poduzeti sve mjere utvrđene pozitivnim propisima kako bi se ispitale sve okolnosti vezane za seksualno uznemiravanje i uznemiravanje na osnovu spola na radu i u radnim odnosima, te će osigurati da osoba koja prijavi ova djela ne trpi posljedice zbog te činjenice.

Član 5.

Svaki zaposlenik/zaposlenica ima pravo da podnese zahtjev/prijavu za pokretanje disciplinskog postupka ukoliko smatra da je seksualno uznemiravan i uznemiravan na osnovu u spola.

Član 6.

Ova odluka stupa na snagu danom donošenja i biće objavljena na oglasnoj tabli u sjedištu Instituta i oglasnim tablama područnih i terenskih ureda te na službenoj internet stranici.

Broj:
Sarajevo,

Predsjedavajući Kolegija direktora


Marko Jurišić



O b r a z l o ŷ e n j e

I - Pravni temelj

Pravni temelj za donošenje Odluke o politici nulte tolerancije prema djelima seksualnog uznemiravanja i uznemiravanja na temelju spola u Institutu za nestale osobe Bosne i Hercegovine sadržan je članu 61. stav (2) Zakona o upravi („Službeni glasnik BiH”, br. 32/02, 102/09 i 72/17), član 13. stav (2) Zakona o ravnopravnosti spolova u Bosni i Hercegovini (Službeni glasnik BiH”, broj 32/10) i članu 86a. Zakona o radu institucijama Bosne i Hercegovine („Službeni glasnik BiH”, br. 26/04, 7/05, 48/05, 60/10, 32/13 i 93/17).

II - Razlozi za donošenje

Razlog za donošenje Odluke o politici nulte tolerancije prema djelima seksualnog uznemiravanja i uznemiravanja na osnovu spola u Institutu za nestale osobe Bosne i Hercegovine proizilazi iz zaključka Vijeća ministara Bosne i Hercegovine sa vanredne sjednice održane 15.10.2019. godine kojim su zadužena sva ministarstva i samostalne upravne organizacije da do kraja 2020. godine, u skladu sa Vodičem za poduzimanje efikasnih mjera za sprečavanje uznemiravanja na osnovi spola i seksualnog uznemiravanja na radnom mjestu u institucijama Bosne i Hercegovine, usvoje odluke o politici nulte stope tolerancije prema djelima seksualnog uznemiravanja i uznemiravanja na temelju spola.

III - Potrebna finansijska sredstva

Za provedbu ove odluke nisu potrebna finansijska sredstva.